

ZELAIN ALDEAN

Luis M. Mujika

Leiho atzetik beztura
ta adar bilutsen nahaspil,
azil negubera hontan
aldapa-behera nabil,
(saiatzen naiz *udazken* hau
ber-*udaberri* dadin...).
azaro etsiezinak
neguaren eraskin,
han-hemen mantxa nagiak
herio-giroz amil,
Zelain-go bide-sasian
habi beltzen hondakin
habia urratuta dago,
belar-izpitan zarpil,
linea iheskorren zehar
oroiek mila asmakin,
Ipintza aldera bi bele
garraisiaz ta arin,
kristal hitsek sugeritzen
zer senti, zer eragin,
gelako kristalen barna
mindura nik emagin...